

# Payí Pitao ríwíyo eañinarini.

Payí rina áamá Jisasomi diñí wikwíroarigiá wí eñí nimóniro ηweagiáyí nání Pitao ríwíyo eañinarini. O Jisaso wiepisagowa worini. Jisaso rixa añínami nipeyimáná xwiogwí rixa obaxí nipwémáná eñáná mimóní uréwapiyarigiáyí obaxí Jisasoyá siyikí imónigiáyó niwímearo xeñwíni xeñwíni re urarigiápi nání, “Jisaso xwiogwí obaxí yómiñí néra nuri nání ámi niweapiniámani.” urarigiápi nání Pitao aríá niwiri ayí mimóní uréwapiyarigiáyí urarigiápi ríwímini mamoro Jisaso neaímeañí míkone uriñwápi aniñí íá xiriro érixiniri payí rina niriri eañirini. Pitao xíomi Romiyo dání pikipíri añwi e eñáná eañirini.

**1** <sup>1</sup> Saimoni Pitaoni —Nioni Jisasi Kiraisoyá xináíníniñí nimóniri omiñí wiiri wáí wurimeiri yariñwáyí wonirini. Nioni payí rina seyíné Gorixoyá diñí tñi diñí wáí wurimeiarinñwáone íá nixirirane wikwíroarinñwápi íá nixiriro wikwíroarigiáyíné nání —Seyíné wé róniñí Jisasi Kiraiso —O negí Ŋwíá imóniri yeáyí neayimixemeaariño imóniri eñorini. Seyíné wé róniñí o imóniñípimi dání diñí wikwíroarigiáyínérini. Seyíné nání payí rina neari mónapariñini. <sup>2</sup> “Nijíá seyíné Gorixo tñi negí Áminá Jisaso tñi awaú nání imónigiápipimi dání Gorixo wá ayá wí seawianiri seyíné niwayiróniro ηweapíri nání ayá wí seaiiri éwinigini.” nimónarini.

**“Gorixo e imónírixiniri íá yiyamiximí neañenerini.” uriñí nánirini.**

<sup>3</sup> Ŋwíá imóniño xegí eñí sixí eániriñipi tñi xixeni neri amipí nene diñí niyimiñí imónirane siwí áamá omi pírániñí nixídiróná epaxípi erane yaníwá nání imóniñí nipini rixa neaiariñirini. Apiaú e yaníwá nání nijíá o —O seáyí e imóniri siyikwí míní íkwiráíniñí imóniri eñípimi dání nene eni axípi imónírixiniri wéyo íá neaumiriñorini. Nijíá o nání xixeni imóniñwápimi dání amipí api neaiariñirini. <sup>4</sup> O seáyí e imóniri siyikwí míní íkwiráíniñí imóniri eñípimi dání “E e niseaiimíárini.” neariñipi —Api seáyí e imóniri ayá tñí imóniri eñipirini. Api rixa neaiariñirini. Áamá pikianiro yaríná nurakínárimi warigiápa íeapá áamá xwíá tío ηweañwaéne nineainiríná xwiríá neaikixeariñípimi dání nurakínárimi

uro Gorixo imóniņpa axípi imóniuro epíría náni e neaiņírini. <sup>5</sup>Nene o imóniņpa axípi e imónířixiniri api nipini e neaiņi eņagi náni seyiné říwí siwía miyi nirkwíniuro sini diņi niwikwíroróná wé róniņi ero wé róniņi neróná Gorixo ámá xoyáyí e éřixiniri wimónariņipi náni pírániņi niđá imóniuro <sup>6</sup>api náni niđá nimóniróná nipíreániri ero nipíreániri neróná sipi seaľmeaariniņipi xwámámí wiuro xwámámí niwiróná siwí ámá Gorixomi pírániņi nixídironá epaxípi ero <sup>7</sup>api neróná séřiximeáyo ayá urimixiro ayá nurimixiróná ámá niyoni diņi sipi wiuro éřixini.

<sup>8</sup>Ayi řipi náni rariņini. Seyiné nioni “E e éřixini.” searıá api tni xixeni nepa nero sayá nimixa nurónáyí, siwá réniņi inariņoi, “Niđá nene negi Áminá Jisasi Kiraiso náni imóniņwápi surímá wí mimónini. Íkiá ná miwé oxí roariņiyiņi mimóniņwini.” siwá éniņi inariņoi. <sup>9</sup>Ayi řipi náni eni rariņini. Ámá “Gorixoyaénerini.” niriuro ai nioni searıá api miyarigiáyí, ayi řwí eņná yagiá Jisaso yokwarimi wiiniņipi náni rixa diņi aría nikeamoro náni ámá siņwí agwí upárigiárani, siņwí supárigiárani, imónigiápa axípi imóniņoi. <sup>10</sup>Ayináni gi nixiximeáyiné, seyiné “Gorixo nene íá yiyamiximi nineairi íá neaumiriņeneriani?” niyaiwiniro ipimónipiri náni nioni searıápi aniņi niyaxídiro pírániņi éřixini. Ayi řipi náni rariņini. Api íá nixiriuro néra nuróná wí nóreámioapíríamani. <sup>11</sup>Seyiné nioni searıápi íá nixira nuro xixeni nerónáyí, negi Áminá Jisasi Kiraiso, yeáyí neayimixemeaariņo xegi xwioxíyo aniņi íníná neameņweané páwíáná yayi niseameríná aga yayi ói seaeáninírini.

<sup>12</sup>Ayináni seyiné nioni agwi searıápi náni rixa niđá imóniuro xwiýiá nepaxiņi imóniņi none searéwapiyiņwápi xaiwí íá xiriuro yariņagia aiwi seyiné api náni diņi seaininía náni íníná diriri oseaiyiminiri náni ipimóniņini. <sup>13-14</sup>Ayi řipi náni searariņini. Negi Áminá Jisasi Kiraiso áwanđi niriņipi tni xixeni gi diņipi niniwárimi unía aņwi e eņagi náni sini gi diņipi niniwárimi mupa eņimi xwiýiá api seyiné ámi diņi sixi oinípoyiniri diriri seaimi náni “Aniņi miní nisearirínáyí, naņirini.” nimónarini. <sup>15</sup>Ayi řipi searariņini. Nioni rixa peņami říwíyo xwiýiá searıá api ámi diņi yaikiropaxi imónipíría náni aniņi miní siņwirániņi niyaxídiri oseariminiri rariņini.

**“Jisaso nikiniri roņáná winiņwáonerini.” uriņi nanirini.**

<sup>16</sup>Negi Áminá Jisasi Kiraiso eņi neániri weapiníapi náni áwanđi niseariranéná negi diņi tni bi miseariņwanigini. Piyiņi ikayíwí ámá wigi diņi tni éwapinarigiápi bi eni miseariņwanigini. Xio nikiniri ŋweaņáná siņwí winaroiwáone seariņwanigini. <sup>17</sup>Ayi řipi náni searariņini. Negi ápo Gorixo omi seáyí e numíeyoari wé íkwiaņwíyo niņwiráriná xio, ikinigiá niyoni seáyí e wimóniņo aņnami dáni re rinénapiniginini, “Gi diņi sixi uyiņá ro náni aga yayi seáyimi dáni ninarini.” rinénapíagi <sup>18</sup>none dľwí ŋwíápimi o tni niņwearanéná newaniņone aría tıyo dáni

aríá e wiŋwanigini. <sup>19</sup>None api seariŋwáone aiwi xwiýíá Kiraiso náni wíá rókiamoagíáwa niriro eagíápi —Api aŋipaxí “Neparini.” yaiwipaxí imóniŋípirini. Xwiýíá api eni tŋwaénerini. Uyíwí síá yiniŋími wíá ókímixariŋípa wíá rókiamoagíáwa niriro eagíápi axípi ríwíyo imóniniápi náni wíá neaókímixiyiminiri náni neaiariŋagi náni símimaŋíyo tinírixini. Awa niriro eagíápi Jisaso ámi niweapiríná wíániŋí nóga uné náni uyíwíniŋí wíá neaókímixiya uníárini. Íná ímiáóniŋí wepariŋagi niwiniranéná xwiýíá xío weapiniápi náni riniŋípi negí xwioxíyo dáni wíá neaókímixiniárinini. <sup>20</sup>E niseariri aí ripi náni “Ayí neparini.” yaiwírixini. Wíá rókiamoagíáwa niriro Bikwíyo eagíápi bi negí diŋíyo dáni “Mfki api náni iyí ririnini?” yaiwipaxí mimónini. <sup>21</sup>Wíá rókiamoagíáwa niriro nearíná ámá wayá diŋíyo dáni niriro meá Gorixoyá kwíyípi ukikayóíyo dáni xwiýíá oyápi nira ugíá eŋagi náni searariŋini.

**“Mimóní searéwapiyarigíáwami Gorixo píri umamoniárinini.” uriŋí nánirini.**

**2** <sup>1</sup>Eŋíná aríowéyí wí mimóní wíá rókiamoarigíáwa nimóniro wigí ámáyo yapí uréwapiyagíápa axípi segí imónigíáyí wí mimóní searéwapiyarigíáwa nimóniro ínimi nimónimáná xwiýíá nepa mimóní ámá nixídiróná xwiríá ikixénipaxí imóniŋípi nisearéwapiyiróná Ámináo niŋeriniŋipimi dáni ayo uroyíroní eŋagi aí omi ríwí umopírárinini. E neriniŋipimi dáni apaxí mé wíárí xwiýíá meárinipírárinini. <sup>2</sup>Uyíniŋí yapí searéwapiyaniro epíráyí epírá axípi segí ámá obaxí xídipírárinini. E yaríná ámá Jisasomi diŋí miwikwíroarigíáyí óí Gorixomi nepa xixeni xídipíri imóniŋíyi náni ikayíwí mearipírárinini. <sup>3</sup>Ámá yapí seaíwapiyaniro epíráyí siŋwí íwí winárarigíáyí eŋagía náni yapí niseaíwapiyiriniŋipimi dáni segí amipí íwí searápipírárinini. Xwiýíá Gorixo eŋíná dáni “Ayo xwiýíá numeáriríná e wikárimigini.” yaiwíaragípi sini piyíá miweneni. “Xwiríá niwikixeríná e wikixéimigini.” yaiwiago sá miweneni. <sup>4</sup>Ayí ripi náni searariŋini. Eŋíná aŋínají wa íwí éaná Gorixo axípi xe ámi ámi érixiniri siŋwí miwiní mimeniŋwí meárinipíríe nimamówáriríná síá xío píri umamoniáyi náni siririkí síá aŋiŋí yinárininiŋíyómini wáriŋinigini. <sup>5</sup>Ámá eŋíná xwíá rirími niŋwearóná rikikirió yagíá níni eni Gorixo xe aŋiŋí e nero ŋweárixiniri siŋwí miwiní xwiríá niwikixeríná xíoyá diŋí tñi inligí waxí níróga niwiápnimeari ayo nipikiri aiwi Nowaomi —O ámá ayí ayo “Wé róniŋí imóniŋí Gorixo wimónariŋípi apiríani?” oyaiwípoyiniri wáí uragorini. Omi tñi xegí ámá wé wíumi dáŋí waúmi tñi Gorixo yeáyí wimiximeariŋinigini. <sup>6</sup>Eŋíná ámá aŋí Sodomí tñi Gomora tñi apiaúmi ŋweaagíáyo eni Gorixo xwiýíá numeáriríná “Sini bi tñi ŋweapaxíymaní.” niyaiwiri aŋí apiaúmi ríá mamówáraná ríá ninowáririri uráwíni imóniŋinigini. Gorixo e niwikárininiŋipimi dáni ayí tñi e íná dáni ámá xío wimónariŋípi mixídarigíáyo siŋwepigí niwiri

nene eni axípi neaímeaniginiri éf owininiri erirí wiñiniginí. <sup>7</sup>Ámá anj apiaúmi ñweaagiáyo e niwikárirí aiwi Rotomi —O ámá wé róniñj worini. Ámá anj apiaúmi ñweaagiáyí rikikirió ayá wí yariñagía niwiniri nání diñj ríá uxerorini. Omi eni Gorixo yeáyí wimiximeañiniginí. <sup>8</sup>Ámá wé róniñj o ámá ayí tñni nawíni niñwearíná ayí ríá kiroarigiápi siñwí winiri aríá wiri neríná síá ayí ayo íkíniñj sipí wiri diñj ríá uxeri yagi eñagi nání rariñini. <sup>9</sup>Gorixo siñwepigí e e yayiñj eñagi nání nene anani diñj re yaiwipaxírini, “Ámináo ámá xío wimónariñipimi xídarigiáyo íwí érixiniri wikárigiápipimi dání anani yeáyí wimiximeapaxírini. Ámá wé róniñj imóniñjpi miyarigiáyo síá xío ámá niyoní mí ómómiximí eníayi tíñj e nání anani píri numamóa nuri awí umeñweapaxírini. <sup>10</sup>Ámá siwí piaxí weáñipaxí imóniñj íeapá winariñjpi oyaneyiníro niponiga uro seáyí e umeñweagiáyo paimimí wiro yariñgíyo añipaxí síá ayí tíñj e nání píri numamóa nuri awí umeñweapaxírini.” Nene e yaiwipaxírini.

**“Mimóní searéwapiyarigiáwa sipí ripi ripi  
yarigiáwarini.” uriní nánirini.**

Mimóní searéwapiyarigiáyí “Nioni aríkí yaríná api nímeanirífeniñjoi?” miyaiwí ayá nepeárimáná wigí diñj tñnini níxídiro añínají seáyí e wimónigiáwami ikayíwí numeariróná eñj óí bi yariñgíamani. <sup>11</sup>E yariñagía aí añínajowa —Awa ámá ayíyá eñj sixí eánigiápipimi seáyí e wimónigiáwarini. Awa seáyí e niwimóniro aí Ámináooyá siñwí tíñj e dání xwiýá nuxekwímoríná ikayíwí bi umeararigiámani. <sup>12</sup>Ámá ayí nañwíniñj imóniñjoi. Nañwíyí wí diñj neñwiperi mimonjyírini. Sa ámá íá nixero pikipíría nání miariñjyírini. Nañwíyí diñj ríá nixeyániri yariñjpa ámá ayí eni axípi e nero amipí ayí majíá imónigiápi nání ikayíwí meararigiá eñagi nání ámá nañwíyo pikiarigiápa ámá ayo eni Gorixo wanínimixiníárini. <sup>13</sup>E yaríná ámá omiñj egiápi nání nigwí meaarigiápa ámá ayí eni axípi wigí sipí egiápi tñni xixeni wímeaníárini. Ikwáwiýíná aí pí pí íeapá winípi sa “Ímí tñni oyaneýi.” niwimóniro yayí néra warigiáyírini. Ayí seyíné tñni nawíni nerimeániro aiwá síañj niniróná wigí íeapá winariñjpi ayá wí nero seyíné siyikwíniñj niseaxéniri nání ayá onimiá miseainariñjini. <sup>14</sup>Apixí í í tñni íwí oinaneyiniri ero íwí nání wimónariñjpi wí miwáramó ero yariñgíyírini. Ámá Jisasomi diñj niwikwíro aí sini nipikwíni diñj aumaúmí minigiáyo nene yariñwápa axípi oépoýiniri wipiomeaarigiáárini. “Ámáya amipí api nioni meapaxípirini.” niyaiwiro éwapigí inarigiá eñagi nání Gorixo “Ríxa xwiríá wikixéimigini.” ráriñjyírini. <sup>15-16</sup>Ayí óí Gorixo oxídípoýiniri wimónariñjyimi píni niwíárimi xarixaríniñj néra xerwímíni nuro nání eñíná sipí wíá rókiamoagí Beramoyi riniñj —Omi xano Biorini. O yagípipimi ikaniñj yariñgíárini. O nigwí nání aga ayá wí niwimóniri nání “Pí pí sipí imóniñjpi aí neríná nigwí nimeari nání ayí anani emíini.”

yaiwiagorini. O áamá wo rixiñí re uráná, “Isireriyí Gorixomi ríwí numoro ŋwíá xegí bi imóniñípimi xídipírí nání ikayíwí tñi uramixei.” uráná o “Nigwí meáminiri nání anani sipí api oemini.” yaiwiaríná dogí xwiyíá nání niñjá mimóniñí aí wo áamá xwiyíá niriríniñí axípi niriri mixí nuriri wíá rókiamoariño diñí ríá nixeyánimáná “Oemini.” yaiwiaríñipi pírfí wiafkímoñinigini.

<sup>17</sup>Áamá ayí iniigí simiñí ná miwé yeáyí yáriñiyíniñí imóniño kipíñí niyiríná agwí kíkíá yáraná iniá ná meá ámi imiñí nípipemi waríñipániñí imóniño enjagía nání siririkí aniñí síá yináriñiyí ayí nání rixa aniñí meaxarío yárinini. <sup>18</sup>Ayí ripi nánirini. Áamá ayí “Nioni pí pí ninimóniríná anani emíini.” niriro weyí e nimeariniriñípimi dání áamá ófí xerwímimi núfasáná píni niwiárimí Jisasomí diñí wikwíroarigiáyí tñi iwamíó kumixinaniro yarigiáyo wíwapiyarigiárini. Íwí nene yariñwápi axípi oépoyiniri wipiomearo íeapá wiwaniñiyí winíñipimi dání sipí oépoyiniri wíwapiyiro yarigiárini. <sup>19</sup>Niwipiomearíná íwí wiwaniñiyí yarigiápi gwí íániñí uxiráriñagi aí mimáyo dání re seararigiárini, “Seyíne nene yariñwápa axípi neróná wí gwí íániñí seaxiripaxí menini.” seararigiárini. E searariñagiá aí áamá íwípi nání aniñí mírogwíniñí naniríná ayí rixa gwí íániñí uxiráriñagi nání rariñini. <sup>20</sup>Áamá negí Áminá Jisasi Kiraiso —O negí yeáyí neayimixemeariñorini. Áamá o nání niñjá imónigiápipimi dání siwí amipí xwíá tío ŋweagiáyo piaxí weánariñípimi niwiafkíarimi numáná ámi axípi nero nání apimi gwí íániñí uxiráriñáná nerónáyí, ayí sipí ríwíyo imónipíríapi xámi imónigiápi tñi xixeni imónipaxímani. <sup>21</sup>Áamá ayí ófí wé róniñí imóniñiyí nání sini niñjá mimónipa nero siñwiriyí, sipí ayá wí wímeáminiri enjipi wímeapaxí aiwi ófí wé róniñí imóniñiyí nání niñjá nimónimáná sekaxí ayá tñí none seariñwápi niwiafkíro ríwímimi mamoarigiá nání sipí imóniñí ámi bi tñi ná seáyí e wímeaníarini. <sup>22</sup>Ewayí xwiyíá nene íniná re rinariñwá ripiaú tñi xixeni yarigiárini, “Síwí xwiríá nidárimáná ámi nuri manariñírini. Odipí áamá wayí pírániñí niroárimáná enjáná ámi xwiriñwíyo gíniñí inariñírini.” rinariñwápiá tñi xixeni yarigiárini.

“Jisaso ámi niweapiniárini.” uríñí nánirini.

**3** <sup>1-2</sup>Gí diñí sixí seayíñáyíne, xwiyíá wíá rókiamoagiáwa —Awa Gorixo “E éfrixini.” wimónariñípini oyaneyiniri yagiáwarini. Awa enjáná niriro eagiápi tñi sekaxí amipí Ámináo, yeáyí neayimixemeariño riñí wái wurimeariñwáone seariñwápi tñi xwiyíá api seyíne ámi diñí sixí níniro pírániñí omópoyiniri dirirí seaimi nání enjáná payí wina neari mónapíñanigini. Agwi eni axípi neri ámi wina neari mónapariñini. <sup>3</sup>Xwiyíá nepa imóniñí rimí ripi nání “Ayí anjipaxíríani?” yaiwíríxini. Síá yoparíyí tñíni áamá ripirirí seamepíríáyí seyíne wé róniñí yariñagiá niseaniro wigí íeapá winariñipi níxídiro nání ripirirí niseamero <sup>4</sup>re

searipíríárini, “Segí mimáyo dáni ‘Ámi niweapimíárini.’ seariñyí rixa ná gi weapariní? Negí ápowa rixa pegíámi aiwi amipí xwíárí tñi aņína tñi iwamíó imóniņe dáni imóniņyí sini axípi imóniņagi náni searariņwini.” searipíríárini. <sup>5</sup>Riperirí e niseariróná ripi náni diņj aríá ikeamopíríárini. Eņíná Gorixo xwiyíá ráná aņína imóniri xwíárí iniiğyó dáni nimóniriná iniiğyó ínimi eņe dáni siņáni imóniri eņírini. <sup>6</sup>Iniiğí tñi eni Gorixo xwíá íná imóniņírí “Xwiríá oikixeni.” ráná iniiğí waxí niróga niwiápínimeari ámá xwíárími ηweagiáyo anínimixiņi aiwi api náni aríá nikeamoro riperirí searipíríárini. <sup>7</sup>E neriņi aiwi aņína tñi xwíárí tñi agwi ríná imóniņípiaú xwiyíá axoyápimi dáni ríá níwiniginiri rárinini. Sía ámá xío wimónariņipi mixídarigiáyo xwiyíá numeárirí wanínimixiniñayi imóníe náni rárinini.

<sup>8</sup>E neri aí diņj sixí seayiņáyíne, seyíne searimí ripi náni ríwí mukinimopani. Gorixoyá siņwíyo dáni xwiogwí 1,000 niņperi aí sía ná wiyiniņiņi órariņírini. Sía ná wiyini nórirí aí xwiogwí 1,000 niņi pweariņírini. <sup>9</sup>Ámináo noneyá mimáyo dáni “Ámi niweapimíárini.” neariņipi náni ámá wí “O rixa miweapí yómiņi yarini.” yaiwiarigiápa axípi e miyarinini. Nene náni weniņi neri ηweani. Yómiņi ayí ripi náni yarini. Ámá wí maníniņa ero níni wíğí íwí yarigiápi ríwímimi mamoro éfrixiniri náni sini yómiņi yarini.

**“Xwíárí tñi aņína tñi ríá nowáriníárini.” uriņi nánirini.**

<sup>10</sup>E neri aí sía o ámi niweapiniá náni Ámináoayái riniņiyi “Ámá íwí meáminiri ría barini?” miyaiwí maiwí ηweaņáná wímeaariņiņa sía ayi eni axípi e seaímeaníárini. Sía ayi aņj píri iwí tñi ríá niniri anipá imóniri amipí aņj píriyo dáni wíá ónariņiyí níni rímimeniņwí neániríná ríá nowárirí xwíárí tñi amipí xwíáyo yariņiyí tñi níni ríá niniri yayimí yowárirí eníárini. <sup>11</sup>Api niņini ríá e nowáriníá eņagi náni seyíne ámá Gorixo wimónariņipimi xíđiro wé róniņi imóniņipini ero yarigiáyí yapi nimóniro axípi éfrixini. <sup>12</sup>E nerónáyí, sía Gorixo Biníái riniņiyi “Gíná parimoníárini?” niyaiwiro aņjini ayí ririxáiniņi nero mónapariņoi. Sía ayimini aņína ríá nowárirí aņj píriyo dáni wíá ónariņipi rímimeniņwí neániríná íkimimí eníárini. <sup>13</sup>E neri aí xío símimaņyó dáni neariņi eņagi náni nene aņj siņi wina tñi xwíá siņi wirí tñi imóniniñiāpiaú — Apiaúmi wé róniņi imóniğíáni ηweapíríāpiaúrini. Apiaú náni weniņi neri ηweaņwini.

**“Awíniņi rónírixini.” uriņi nánirini.**

<sup>14</sup>Ayináni diņj sixí seayiņáyíne apiaú náni weniņi nero niηwearo náni Gorixo pírániņi niwayirónirane ηweaņagwi oneaniniri ríwí siwíá miyí “Amipí bi náni ríá mímeariniņa nerane íkwiráiniņi siyikwí mání éwanigini.” niyaiwiro niyuniro éfrixini. <sup>15</sup>E neróná negí Ámináo aņjini

ámi miweapí yómiñí yariñípi náni re yaiwírixini, “Ámá obaxíyo yeáyí uyimixemeámíániri yarini.” yaiwírixini. Negí nirixímeáo Poro eni ðiñí émi saímí moñí Gorixo sixí umímoñípimi dáni niriri ríwamiñí nearíná axípi ripíniñí niriri neari seamónapiñí eñagi náni e yaiwírixini. <sup>16</sup>Payí o eaariñíyí náni api náni eni axípi niriri eaariñírini. Xwiyíá payí ayo eániñíyí wí siñáni mipimóniñagi náni apaxí mé nijíá imónipaxí mimónini. Ámá majíá nikáriniro ðiñí bi bi momearigíáyí xwiyíá api ikweakwímí niriro rarigíárini. Xwiyíá Gorixoyá Bikwíyo riníñíyí ámi wí eni ikweakwímí niriro xerwíni niririñípimi dáni síá yopariyi imóniníe náni ríá meárinarigíárini. <sup>17</sup>Ayináni ðiñí sixí seayináyíné, api náni seyíné rixa nijíá imóniñagiá náni ámá ríá xearimixarigíáyí sipí nero xerwímíni waríná seyíné eni axípi éwapígí iniro Jisasomi ðiñí niwikwíroro síkíkíniñí onigíáyíné piéroro epírixiniri awíniñí rónírixini. <sup>18</sup>Niaíwí apíroariñípa axípi seyíné ámáyo ayá urimixarigíápi xwé napíróa uri nijíá negí Áminá Jisasi Kiraiso, yeáyí neayimixemeaariño náni imónigíápi api eni xwé napíróa uri éwinigini. Agwi rínáraní, ná ríwíyorani, omi aniñí íníná seáyí e uméwanigini. “E éwanigini.” nimónarini.